

Lindja e tatimit, kërkueshmëria, momenti i lëshimit të faturës tatimore

Bazuar në dispozitat në fuqi, të Ligjit Nr .92/2014, datë 24.07.2014 “Për tatimin mbi vlerën e shtuar në Republikën e Shqipërisë”, i ndryshuar, TVSH-ja lind kur përmbushen kushtet ligjore të domosdoshme për të kërkuar këtë tatim. Me përmbushjen e këtyre kushteve, shpjeguar më poshtë, autoriteti tatimor ka të drejtë që t’ia kërkojë tatimin mbi vlerën e shtuar, personit përgjegjës që ngarkohet nga ligji për ta paguar.

Kushtet ligjore për lindjen e TVSH-së

Kushtet ligjore për lindjen e TVSH-së, përmbushen kur:

- a) Kryhet furnizimi i mallrave ose shërbimeve;
- b) Kryhen pagesa pjesore ose pagesa të njëpasnjëshme për furnizimet e mallrave, ose të shërbimeve, por furnizimi i mallrave ose shërbimeve, faktikisht nuk është kryer. Këto furnizime mallrash ose shërbimesh konsiderohen të kryera në përfundim të çdo periudhe, së cilës i referohen pagesat;
- c) Furnizimet e mallrave dhe shërbimeve të kryera në mënyrë të vazhdueshme, brenda një periudhe kohore, përfshirë operacionet e ndërtimit, konsiderohen të kryera në të njëjtin muaj, në të cilin lëshohet fatura në përputhje me pikën 5, të nenit 99, të Ligjit;
- d) Për çdo pagesë të kryer para se të kryhet furnizimi i mallit, ose para përfundimit të furnizimit të shërbimit, TVSH-ja mbi pagesën lind dhe bëhet e kërkueshme në momentin e arkëtimit të shumës së paguar;
- e) Si rregull i përgjithshëm, fatura lëshohet në momentin e furnizimit të mallit ose shërbimit, por, në rastin kur fatura tatimore është lëshuar përpara furnizimit, TVSH-ja bëhet e kërkueshme në momentin kur është lëshuar fatura.

Detyrimi për të lëshuar faturë në furnizimin e mallrave ose shërbimeve

Personi i tatueshëm që kryen një furnizim mallrash ose shërbimesh, detyrohet të lëshojë një faturë për atë furnizim si më poshtë:

- i) në momentin e furnizimit të mallit ose shërbimit;
- ii) kur mallrat janë lëvruar, ose kur ato bëhen të disponueshme;
- iii) në momentin kur shërbimet janë kryer;
- iv) fatura mund të lëshohet në mënyrë periodike për disa furnizime mallrash ose shërbimesh, të cilat furnizohen në mënyrë të rregullt ose të vazhdueshme, të realizuara midis personit të tatueshëm dhe klientit të tij në të njëjtin muaj, në të cilin furnizimet janë kryer. Gjithashtu në ndërtim, fatura tatimore duhet lëshuar çdo muaj.

KUJDES!

Për furnizimet e shërbimeve, për të cilat TVSH-ja paguhet nga marrësi i furnizimit, fatura duhet të lëshohet në të njëjtën periudhë tatimore në të cilën shërbimi është marrë, por jo më vonë se data 14 e muajit pasardhës.